

國朝畿輔詩傳

國朝畿輔詩傳卷十二

長洲陶樸堯薌輯 任邱邊浴禮袖石校

張永祺

永祺字爾成大興人順治九年一甲二名進士

歷官大理寺少卿

五家詩鈔癸丑春至魏博得金灘倡和詩張爾成先生作先生督豫遭釐弊剔蠹嘖嘖有聲公餘以風雅振作鄴中多悲歌慷慨盡收燕趙之才

得仲連書喜而有作

長安冠蓋交烜赫金張第遨遊金谷園朝華夕委砌上客侈聯鑣笙歌競狼戾吾子廁其間冰雪不相締蕭然

一篋書擷芳采六藝有時發枯吟太空秋蟬蛻霜畦逞
韭花白酒酣新霽萬事伏枕過六書一燈細終日無所
語孤行海嶽勢昨來薜荔裳慰我梁園滯展此璫華音
晴峯俯天際百川日夜流一雁聲嘹唳蘆溝攜手行十
年九分袂坐待月華升圓景散虧蔽與子堅素心芳草
珍蘭蕙

白雲從東來空庭一樓止悠然萬古心秋水差相似寒
鳥日夕翔雨雪遺音旨念我生平友中夜披衣起徘徊
視孤檠炯炯心猶是華星錯遙空廣除菊紛委歲月車
馬間勞人昧所以上國勝遊觀聯榻披圖史一別阻清

歎素書憑雙鯉達士秉曠觀嗟余逐强士歲宴梅花開
夢子空山裏

送施愚山遊嵩少

嵩嶽立中天河流具今古在昔祀典修百靈尊后土閭
世槐與柏歷歷猶可數日月出其中川原如在戶千年
寥澗心達者與爲伍愚山秉奇尙所歷不自詡飄然來
帝京預想吟梁父羣公富詩篇惜爲茲遊譜恍惚陟
其巔奇妙一一睹秋光清遠心登頓未停午捫蘿石徑
懸蒼翠衣裳取三花拂面生二室森然俯萬壑變陰晴
九州人吞吐平田吹稷香石髓流鐘乳迴瞻草履跡處

處烟生縷青到一色天白眺下方雨蒼龍澗底眠異獸
摩空舞仙掌蓮花峯甘露傳燈祖殿角新琉璃殘僧築
環堵梵音空裏聞定香散天姥花氣四時春鶴言此山
主嗚呼湖海遙名嶽崇於五寄謝簪紱儔小豁胷中腐
平生江南遊登岳曾行部大觀窮宇宙盧杖終焉補

淇泉道上大風苦寒

晚來雲從日腳起須臾暝色催行李策馬衝寒到驛亭
一燈熒熒響窗紙白酒數杯解饑飮枯腸欲鳴聊徙倚
夜半忽聞風吼聲倒海驚沙震遠邇坐臥空牀不能寐
攬衾就枕涼如水曉行酒力面難勝泉流淙淙復聒耳

道傍候吏我知爾笑我風塵猶未已茅簷婦子三五人
欲向使君有所陳使君年年去都門一年幾度走河濱
昔日紫髯豐頤頰今來憔悴鬢如銀殷勤婉暱爲余說
昨歲苦寒地凍裂早春無雨麥苗稀四月黃蠶桑枝折
使君六月住都門此地三伏苦炎熱秋來一望草全枯
井渴石乾泉亦竭狂飈鎮日走黃沙到今十月仍無雪
倉皇數語畏人嗔其時低頭眼流血我聞此語如履冰
立馬當風寒欲徹嗚呼吾寒尙有敝羊裘嗟爾百結鶉
衣不自由嗷嗷懸罄勤輸納吏呼夜怒聲啾啾吾聞冬

雪春雨太平日奈何獨廛 廟堂憂

不寐

不寐漏三更風聲雜雨聲寒從欹枕得夜向一燈明閱歷成吾老艱難見物情片帆歸計早負郭看春耕

孫無懷同家爾執遊黃華

見說黃門彥林慮紀勝遊巖深常帶雨樹老自生秋絕壁無人到仙蹤尙可求三峯留筆處日月濯苔幽

送胡存人南歸

握手談今夕離情已黯然師恩深自責交態畏人憐別酒風前路孤吟日暮天停鞭聊極目江水迴浮烟

李古津夫子貽書兩及書此寄懷

深杯消往事桑柘帶平蕪舊侶辭三殿新知得五湖攤
書晴日好習靜片雲俱欲閒蒼生累高吟且據梧
人誰嗟失馬我亦類飄萍聽雨頭新白看山眼舊青水
環沙麓障雲覆早春屏寥落渾無事流年紀驛亭

西樵考功貽書見詢寄此奉懷兼呈貽上農部

長夏炎蒸三逕蒿南來雙鯉念同袍詩成江漢晴川遠
別後關河尺素勞修禊他時借逸少含香此日憶山濤
支離病骨誰能飲愁聽疎鐘首重搔

送爾執北歸後悵然有感

鄉關攬轡客心驚薄暮空林倦鳥鳴婚嫁向平雙鬢改

酒棋謝傅一身輕
桑乾雪映千山曉
易水霜流萬壑清
話到微醺官舍後
膝前兒女倍含情

寄懷杜子靜太史

帝城烟柳藹春風
珥筆從容閣道東
豁達欲交天下士
殷勤愛與故人同
異時司馬文章盛
此日征南物望崇
退食銜杯何地醉
憑欄延佇有歸鴻

贈程念伊太守

暮雨征途不暫閒
停車相向意茫然
秋來駐馬纔三月
冬去除書又一年
漢代股肱褒治郡
周南方嶽賦歸田
家園直北抽簪去
春日遲遲花正妍

和繹堂送顧菴南歸原韻

去矣詩人又漸稀
青尊遙夜暫相依
西園詞賦憑誰寄
南國文章羨爾歸
落日蒹葭鴻影亂
秋江烟雨蟹螯肥
應憐留滯登樓客
寒夜論心願不違

僧房長夏反離騷
燕市狂歌飲濁醪
野水沙鷗迎畫舫
澄嵐翠黛識官袍
思歸媿我荒三徑
領酒知君藐二豪
到日攜筇清興適
白雲紅樹兩峯高

金灘賦贈邵淩玉學憲

河畔春風解纜初
故人相向漫欷歔
握中十部名山業
篋裏三年秀水書
地近揚雄時問字
途臨阮籍一迴車

桃花水繞漳河去尺素東來寄鯉魚

郭 棻

棻字芝仙號快圃清苑人順治九年進士官內

閣學士有學源堂集十八卷

四庫全書提要學源堂集十八卷郭棻撰其文頗爲華瞻惟酬應之作太多未免失於刪汰棻曾修畿輔志及保定府志今集內所載星野沿革等說皆志中之文蓋用鄂州小集載新安志序之例也

畿輔通志快圃王辰進士庶吉士降按察司僉事累遷侍讀博學工文詞華豐瞻常總修畿輔通志著皇畿大一統賦累素萬言士林傳誦同時分修者進士則安肅師若瑋容城李瑞徵舉人則新安魏一鰲清苑郭熒雄縣馬之驪板貢生則安州房循獲諸生則清苑劉可書王胤

高陽李珣亦
俱有文名

潘應寶傳公聰慧過人工詩善書乙酉舉孝廉
王辰成進士選庶常歷官贊出參山西臬幕殯
心奉職政事修舉方伯王公襄璞觀察揚公猶
龍深倚毗之居晉八年吏民敬愛入爲大理寺
寺正會有以公才奏聞者詔復原官公感
激涕零作詩紀恩益加淬礪講求經世
之務凡禮樂刑賞用人理財諸大政莫不探索
原委上下數千百年因革損益之故瞭然如指
諸掌尊掌詹事府事晉內閣學士政府重地惟
聽相國主裁學士無所軒輊公獨曰學士者古
之參知政事也若唯諾相隨不發一語何參知
之有自抒所見侃侃論列滿漢相國咸虛心采
納罷職歸里嘯詠終日長
吏式廬造請輒婉詞謝之

纂修

世祖章皇帝實錄告成蒙

恩

晉秩

頒賜銀幣鞍馬有差仍

賜

宴禮部恭紀奉和李高陽相國韻

皇祖道登三凝績府修六光華日月昭清寧乾坤復

垂衣十八期謨烈燦徽躅

帝絃埏垓恢

聖澤海陬沃我

皇纘鴻圖耿光勤初服典

則念鈞石股肱倚喬木受歷紹堯心闢門明舜目玉署
延時髦金匱啟日錄繼述思覲揚編摩嚴誠勗肇修循
古章館宇宏以肅誰實職厥要監總敕枚卜誰實職厥
詳羣才備林檉發凡義例明分曹十二局維新庀簡箋
求舊召郎屬記注合章疏萬有三千牘宣付翰墨林精
繹無促督縹緗玉牒文藻采柏梁曲繁簡體度裁洪纖

寡疊複自是九叙功豈曰三長足瑤笈曜石渠龍賓複
芸屋文競五鳳修字拚千毫禿獸炭烘沍寒梅漿解炎
燠閤時五支干精勤首鈞軸七十二芝函分體亦分積
午月應當陽晨鐘啟旦旭舉以朱寶輦導以羽葆蕭

天子南面受 殿陛歌皇穆瑤編一代書靈貺萬

年祝仰識 天顏喜膏流臣共沐宮傳與庶尹加

秩視班祿繆錦酬報章房宿下天駟南宮列上尊儀典
非繁縟臣自辭香案拓落風塵俗一紀叨 賜環

天亭而地毒尙方分筆札大官給公餽受茲 恩

籠深靜思罔勞碌况乃攀附奇厠名帛與竹所願勤紹

庭陟降益誠篤

祖法鑒萬秋

皇仁潤四

瀕奎壁來人間呵護霞霄籙

高粱河觀漁登高阜望西山雲氣

郊游暮春好歷歷西山道玉泉滙高粱澄波日瀨瀨步
燥河之潄盱衡愴懷抱漁子不羨淵網罟絕苻藻獲麟
一尺強樗條貫顛倒不換酒家酤持享趙魏老舍之陟
青岡烟嵐西山皞游絲織翠峯空花散蒼昊延佇意以
馳買山悔不早

王雨若教諭柏鄉

行將博士座且繫孝廉船野水桃花漲春風雁字天攜

家就五斗入署落三鱸見說詩如畫風流比鄭虔

瓜州阻風

聞道江風急兵船坐潤州兩城纔咫尺三宿又淹留酒
薄吟詩醉萸殘聽雁愁行蹤渾未定來往歎浮鷗

金君選守澤州

猶憶高都境噴嵒倚太行沙田耕細鐵茅屋戴繁霜懷
慨人鄰趙勤劬地比唐知君能作牧不愧謝庭芳

對月

圓空月常滿皎皎一天浮人影涼如水花香淡得秋魄
懸孤樹立雲動野星流絕爽登臨日何須賦倚樓

飲酒

世事只堪醉銜杯水竹間風光連日好天地幾人閒戶
大容清聖厨貧供小蠻頽然客方至明月滿柴關

渡涿鹿

馬背十年老輕舸喜一撐秋橫雲際鳥烟抱水邊城鶴
觀松多禿虹橋沙欲平往來爭渡客名利各含情

渡濤沱

秋沙十里白沙際滾黃雲野氣橫蘆渚荒風起雁羣大
河原一派全趙此中分自昔名危渡濤聲不可聞

題畫

扶筇尋竹塢曲磴不愁迷山氣晴生樹泉聲夜落溪鳥
隨雲上下人逐月高低約友彈新調梧君遠獨攜
一艇放秋水秋風滿釣竿如妝山點翠似醉樹懸丹濯
足知遺履科頭想挂冠自然非范蠡無乃是張翰

秋感

自是安劉計其如老漚驕黔驢終畏虎蜀棧竟焚囂甲
肯從天下兵當指日銷頻年勞叔子豈忍賦逍遙
一旅蠶叢破刀穿來歎衣豈同卿子殺誰入蔡州圍賊
壘雜羌種王師頓武威近聞蜀道易來往任封豨
漫道伏波老銅猶百粵標如何勤下瀨猶未破南潮山

雨金城白樓烟鐵漢銷不知雷海上誰復響金鑣

六月六日少司馬楊地一銀臺張爾成水部顧見

山寄快園雅集和見山韻

折柬高軒集林深地轉幽一天梅子雨六月蓼花秋
易水寒浮琰西山翠點樓知君有逸興留壁畫滄洲
知己無多輩高談金伏中相看塵鬢短莫放酒杯空
竹鳥啼殘露槐蟬靜晚風夜游安用燭三徑正螢紅

夏日寄快園集同館小飲

寄託林泉興編茅水竹間拂牆七尺棗對几一卷山
掃徑留苔甲停車倚藥闌銜杯誰與勸花裏鳥關關

勝友開軒集人閒地氣涼座因碁局密話對酒尊長松
老子垂徑竹繁孫過牆伊誰忙襌襪吾輩且徜徉

春暮張爾成捕卿招同李書雲余銓廬王北山三
給諫摩訶菴看杏花

破懶尋春遠招攜石竺間興高卽暇日地闊况禪關樹
裏千聲鳥尊前一帶山登樓憑眺遠不負此官閒
野曠春逾媚林烟綠一園遠公容設酒曾點未成衣坐
樹鶯聲老蒸田水氣肥閒雲如有意故故傍人飛

病起野望

不是秋霜淡寥寥病客情水天青不了雲樹白相生去

鳥孤烟杳寒花小徑橫
遣懷頻悵望物候變禪聲

丙寅中秋寄快園步月

露白園林夜扶筇
當野遊螢高星動樹花淡月明樓朋
輩衰年少壺觴晚興稠
此中無扞格不忍賦悲秋

中秋

十載中秋月無如此夜
清碧雲高鳥去白露暮烟平
老話驚孫子閒情憶友生
酒酣憑杖起霜鬢戴星明

劉木水由代州貳擢守遼陽州

五馬原侯秩三韓况
帝鄉風能清代郡才可問南陽
海氣榆關紫秋花鐵嶺黃
三年屈指是粉署待含香

顧筆堆太學招飲池亭用杜少陵遊何將軍園林

韻

爲赴虎頭約頻過虹影橋高楓環僻徑淺水漾秋霄門
狹籃輿入賓遲折柬招舉帷貪看竹五里覺非遥

過庭循曲檻步履漸幽清老石疑蹲虎新蟬學囀鶯梅
漿寒代茗蒲筍嫩堪羹列坐斜臨水人從鏡裏行

宛轉石梁築參差水柱支去尋烟外柳已到閣前池日
上荷全覆風來魚不知新秋暑未處爽氣快同披

夕陽忽滿席亭畔小樓開不大三間屋曾容幾樹梅雨
宜花氣入晴喜月光來俗客應稀至君看石上苔

日涉方成趣翳林多晚雲不成金谷地眞愧玉堂文蟲
語催花細茶烟入樹分此時歸正好涼月白紛紛

翠蛟潭

水烟蒸石黑列列翠蛟宮終日長疑雨雙山不讓風畫
眉鳴榭翠刺角迸霜紅潭影青蒼變斜陽返照中

迎薰亭侍宴

太乙波明影碧霞斗牛星畔泛仙槎百壺湛露

聖人酒十里香風君子花峽蝶過船吹芡粉菱鵲出水
帶菱芽銜杯四望歡無極身在瀛洲第一艖

翰林院啟館

踰躋仙署聽宣麻北面人崇擁絳紗豐沛有才皆玉笋
蓬萊無地不金華日懸雙闕朝光滿春到長安淑氣除
中祕正饒蚪蚪蹟藜烟今夜散朱霞

張仲若學士總制宣雲

詔從綸閣簡儒卿總制宣雲

錫鉞行萬里邊城

新壁壘十年星嶽舊聲名絳旂懸火桑乾暖繡斧飛霜
榆塞清會見華陽歸戰馬曲江大業待調羹

除夕感懷

老至垂垂蒲柳姿凋零况是歲寒時不才合作書中蠹
無用真同面上眉冷落生涯山一片蕭騷情與酒三卮

紛紛薦徧原多事羞問人間大小兒
海濶天空一草堂窮年默坐更何妨
安排書卷爲牆壁
督護花枝度雪霜此日人情徒咄咄
向來世法總蒼蒼
平生眼界凡三變不屑區區問智囊

太原雙塔寺

繫馬雙槐落照殷愁人獨喜扣禪關
烟生佛洞孤燈閃
霜老秋林萬葉斑月近疑懸松頂上
雲來只在塔中間
偶憑紺閣頻西望十里銀濤蕩碧山

寄張華平同館時假歸萊陽

喜從別後得雙魚伏枕慚無作報書
博物如君真海錯

多愁似我自山樗經春藥裏空花鳥入夢朋情減飯蔬
過計驂駟趨闕日金殿歷歷桂華疎

謫晉臬幕留別同館

五年冷署傍蘭芬此日傾觴忍對君何物小臣偏負
國從來遷客重離羣身隨鴻雁驚秋早夢到瀛洲喜夜
分千里太原知未遠祇愁關塞隔烟雲

抵里寄呈都門諸友

浣盡衣塵京洛緇布帆無恙報君知何緣去國人爭
問此日還家我所思殘菊猶堪供釀料丹楓正可寫新
詩獨憐羸馬青衫客又逐霜風訪晉祠

將赴太原留別親友

繁霜不惜點鵝裘
媿說茲行亦宦遊
雪壓關河人面冷
塵飛劍佩客裝浮
古今何代無三黜
貧病嗟余有四愁
萱老鵲鴒猶弱羽
太行雲影悵悠悠

除夕

身經三十四除夕
不獨蹉跎感歎增
鸚鵡啁啾人自喜
桔槔俯仰我河能
河汾霜滿停孤轡
驛館風多護短燈
遙憶長安簪笏客
雞鳴都爲蚤朝興

中秋雨

秋雲漠漠樹陰陰
細雨無聲淡客心
風定花猶垂冷露

塵空鳥自散清音不禁見月生歸思豈爲窮途學越吟
且拂石牀傾白墜池塘落葉看浮沈

送崔夏章少詹罷歸長垣

卽寄太翁成一同年

青宮少尹出春明十丈紅塵此日清不信文園真病渴
爭如今伯省陳情蘆溝送客桃花水督亢催人柳浪鶯
抵里過庭應有問爲言北郭二毛生

東陳謫公

偶來非爲賦閒居擬結陶籬傍小廬風雨叩門皆老友
晨昏擁膝半方書慚無北海芳樽滿遂與南州高士疎
百尺樓頭如可下呼童好爲摘園蔬

國朝畿輔詩傳 卷十二

去

開塾示諸子

邇日殷勤置絳帷百年烟榻古香披
願爲韋氏傳經地不作陶公賣子詩
座上春風休計月簷前寸晷好乘時
紫囊戒佩原吾意白雪難歌卽爾師

高仙友光祿書屋落成

聞君新構墨莊成斐几藤牀事事清
光祿池臺看窈窕仙人樓閣聽蕭笙
月來蕩漾花窗影風過丁東竹鐸聲
諫草避人焚幾篋閒心應付橘中枰

讀申臯盟登岱吟卽柬寄

獨有豪情老不收芒屨雲水泰安州
追攀名嶽當奇賞

曾否閒心憶舊遊
康樂詩才清木石
休文病骨愛林邱
郎山我亦登臨徧
那有浮雲蔽日愁

狂態因循未肯收
三年無夢到神州
君方梁甫吟風罷
我已涇關踏雪遊
強酒自能開小戶
逃禪常欲臥高邱
禪魔酒病都非累
卻爲家園漠漠愁

秋日邀丁野鶴陳藹公飲快園

入座人稱第一流
蕭森木末雨催秋
南州高士青霞氣
東國才名白雪樓
杯底月明珠在手
席間楓落玉搔頭
只今倘惜徐家肺
相對翻慚水上鷗

井陘道中

寒濤捲雪勢回旋戰壘猶傳拔趙年
澗柿倒看紅似燒林鴉斜出散如烟
左車謀畫何難用背水功名亦偶然
成敗英雄休更論千秋陵谷幾回遷

齊鐘銘明府招同郡諸公慈仁寺看海棠

十年不醉此花傍花尙婆娑我鬢蒼
脫帽當筵仍故態留賓投轄盡同鄉
彩霞繞樹連春色紅雪飄燈妬酒香
誰道看花休卜夜月明正好度霓裳

贈程穆倩山人

廿載懷君老始逢
飄香不枉爲南豐
縱談身世悲桑海
屈指知交歎雪鴻
酒國有人堪獨往
硯田無種與時窮

千旌早晚徵耆舊莫掩邢江半畝宮

湖上喜遇查王望都諫

拏舟江國獨遊遨湖上逢君慰寂寥題句杏園餘我輩
論心蕭寺快今朝飛光只解催雙鬢春水同看漲六橋
如此情懷那不醉傳柑天氣足魂消

嚴藕漁官贊假歸無錫

瀟灑抽簪出鳳樓春風人上木蘭舟一編青史垂行蘖
十載紅塵浣素裘去日鶯花憐滿目到時江雨漫回頭
長安老友無多在走馬蘭臺尙滯留

途次接張爾成大參從青州兩寄晉中書

雙魚兩度出陞關驛路開緘淚欲潛失馬余猶淹幕府
同人誰復列鴛班張堪身近瀛洲峴郭泰家原介子山
爾我行藏何日定風塵都減舊時顏

開函辛苦語爲官時序霜飛萬物寒我輩自然多硯礪
人情今日更波瀾但將佛子犀提誦都作莊生蛺蝶觀
身到窮途方有悟蜃樓莫怪海雲殘

僦居太原僧舍

不獨枯心老似禪行旂已傍法輪縣常依佛地諸緣幻
偶到香臺百念捐月轉松陰終是影雲移山翠自成烟
寒花秋水蒼涼景遷客萍蹤又一年

晉祠

山根怒迸一泉噴，遶水環山遂結村。
石殿沈沈關雨氣，鐵人莽莽繡苔痕。
青帘綠柳橋頭屋，花鳴香茨堰下門。
試到祠中高閣望，麓臺山畔野雲屯。

裴晉公綠野堂

平阜十里簇雲根，老樹清泉綠野門。
人襲風流衣帶古，代更兵火姓名存。
鴨眠春雨烟三尺，林吐清光月一村。
獨有邱園天地隱，當年劍客滿乾坤。

鄭淡菴督學禁中

晉人兵部

才名烏奕鄭當時，樞府含香選鵷鷺。
自昔楚才當晉用，

于今北學是南師文峯赤壁增三賦理窟黃陂拜二祠
欲爲詞壇生氣色洲臨鸚鵡一傾卮

別曹秋岳夫子十稔偶于晉陽拜晤感而有賦

左官次第買歸航回首青門已十霜元鳥尙留龍馬塞
逐臣敢負芰荷裳且將世事浮桑落況有文詞動柏梁
爲憶髫年環絳帳幾何雙鬢已蒼蒼

王蓼航宮允備兵南嶺

憶辭香案正翩翩一臥蘇門二十年秋水龍藏雷劍氣
夏峯鸞嘯太行烟中人望高珠斗海內詩名讓輞川
偶爲蒼生重攬轡潯江試放米家船

詞曹只合老西園。賴有君行雪。此言攜雨自能澆鐵樹。
折梅還欲寄金門。嶺南屏翰分。甌粵江左歐。曾見弟昆
去到滕王高閣。望水天一色舊時痕。

趙韞退大參分守河北

王屋蒼生迓百泉。使君持節去旬宣。賈生當日原年少
汲黯於今許召還。一道清風淇水曲。三分古蹟鄴臺邊。
紅烽白羽民勞止。珍重褰帷問潞川。

司馬溫公墓

涑川荒壠宋名臣。社稷文章繫一身。名動蠻夷周召虎
書成通鑑魯郊麟。僅存謚法碑三字。不盡衣冠祀幾人。

數里林巒連綠野二公隔代足相鄰

李仲如以廕補奉天治中

仲如能畫

贊皇公齋衛公才三輔黃圖一掌該新領銀青周內史
遠臨鴨綠漢留臺日烘海嶠雲成閣霞結山陰樹似梅
屈指遷除應有詔醫無閭人畫圖來

魏繼伯視饒兩淮

與君攜手話淖沱二十年來我鬢皤唐代魏徵陳十漸
漢家郭泰老三河才名已壓西臺栢直指今巡東海嵯
聞道揚州花滿樹鹽梅須爾作羹和

趙鐵源太史典試粵東

膠海才人趙倚樓
棘闌星使日南游
一帆萬里蠻烟靜
八月雙江梅嶺秋
墨水江邊看鐵漢
桂花香裏點魚頭
賢書露布知齊上
幕府文章認馬周

泊京口

百里揚舲過潤州
停帆恰對大江流
金山寺近聞鐘鼓
鐵甕城高應斗牛
地到海門雲自密
水來天塹浪全收
三更坐聽濤聲急
荻渚風吹一片秋

中秋後五日邀沈繹堂祭酒馮貽仙庶子高爾豹
進士雅集百可亭次爾豹韻

冷雨秋亭夜照釭
愁心擬向翠濤降
冰輪有意來空谷

鐵板何人唱大江五粒禿猶垂小徑九華高欲入晴窗
座中咳唾珠璣落國士驚看遂有雙

秋日邀任青巖正字高淡人張朝弼兩錄事集百
可亭次淡人韻

白露當庭雁影南客來不用月成三兩餘有草皆含翠
樹密無山亦吐嵐近日閒雲紅似錦迎霜秋水碧于藍
蹉跎未覺年華暮何事林楓葉已酣

闌空夕照滿高槐杯勸飛光興更佳露著秋藤枝綰綬
月臨風竹影橫釵釵讀騷飲酒眞名士小築幽棲稱老懷
眼底升沈安足論雄心只擬頌平淮

重陽後一日集項眉山齋中看西山霽色

夜聽冷雨濯西山翠
嚙朝來爽氣還
偶對墨林書畫裏
過分秋色蔚藍間
斜陽影動雲歸寺
寒露聲隨雁度關
莫爲臥遊空挂笏
尊前饒有菊花斑

王印洲臬僉督理河南河道

印洲舊爲江西督學

東山養望十年餘
小試河渠太史書
曾聽洪都歌有斐
肯教汴野歎其魚
乘機權與冬官比
繡豸衙分憲使居
指日錫圭應底績
負圖龍馬更何如

紀孟起樞部權關金陵

春風擘柳導霓竿
司馬當關江界安
鐵鎖截流龍虎郡

簪纓交舞鵝鵲冠兵連楚澤檣帆集貨達閩疆市舶寬
權稅詰戎君並領好將商力壯三單

春日張永舒太學招同李湘北學士王北山給諫
杜子靜宮允張南溟比部雅集遜園次韻

正欲降愁部酒兵銜杯爲愛遜園名舌存未許談時事
心老纔知淡物情小鳥爭來高閣噪新花還向舊枝生
灑魚易釀皆鄉味不羨張翰蓴菜羹

誰道蓬蒿仲蔚居近來修築儼清虛扶藤上格虬形轉
種竹臨窗个影疎客語豪常驚碧落詩才老欲過黃初
棋枰酒琖琴牀外數卷縱橫引睡書

立秋二日書百可亭壁

鳥歌花舞未全幽，秋在人心易得秋。
微雨欲來涼北牖，夕陽無定下東樓。
螭蟬結塞情何怯，蟬螭成橋影乍收。
獨有臥遊堪自遣，情誰畫壁滿滄洲。

送顧見山出任陝西臬僉分巡洮岷道

雲間才子水曹郎，雪月征車去朔方。
位與西臺分斧鉞，星從北斗見文章。
五原石峽秋烟紫，萬里金城水氣黃。
堪羨霓旌千騎擁，蕭關迢遞下淒涼。

除豪氣盡鬚塗霜，正欲從君臥石倉。
見說虎頭行紫塞，誰教龍首鎮青羌。
邊烽夜靜連榆谷，風雪天高度渭陽。

西隴無梅勞驛使，疊歌宛轉對離觴。

送白仲調進士歸金陵

驚看君去意昂然，白羽紅烽路幾千。
家在三江龍虎地，人歸八月雁鴻天。
休嗟知己無劉尹，須信同心有呂虔。
舟到金山應坐嘯，一聲吹斷海門烟。

道目和尚折山中蠟梅見貽賦答

知爾拈花笑幾時，冷香遙贈兩三枝。
分將山色憑高士，賸有酸風護法師。
正色莫嫌蜂蝶少，寒芳猶喜雪霜遲。
瑤瓶絕勝巡簷笑，不作羅浮夢裏癡。

徐昌侯茂才歸華亭

送君歸去意怆怆迢遞江關畫角聲豈是馬周無上策
只緣王粲有鄉情布衣可惜京塵黑絲髮何妨塞雪明
若買山居深更好東南戎馬正縱橫

乙卯四月金棟存太常招同楊地一少司馬曹顧
菴學士沈繹堂大司成張爾成銀臺項眉山學
士雅集分韻得一先

關山湖海正烽烟老友傾尊感慨偏日淡燕郊鶯卷舌
風驕榆塞樹飛錢令傳司馬猶行酒卦叶同人莫問年
不醉婆娑須底事聞雞誰肯更爭先

歲暮雜感

感慨今年未有涯那堪歲暮旅愁加空堦疊雪看危石
老樹吟風聽夕鴉奏捷江湖書正急傳聞關陝卒爭譁
奇謀將相應多在卻使書生在歎嗟

劉山人遊中州憑寄張上若同館

輶車憶下午橋莊痛飲醞酬月正霜白髮我猶歌偈仄
青山君已定行藏淦河春雨騏驎浴行塢秋烟薜荔香
滿眼干戈憑問訊金臺客老意蒼茫

題畫

白瀑界青壁綠巖跨紺閣繫舟不見人知去尋丹壑

望家信

徙倚寒江鄉思多蕭蕭木下洞庭波
帶人無數南征雁都未經從易水過

題湖心亭

百幅畫圖明鏡上四時烟雨翠屏間
游人解道湖光好船到湖心卻望山

夏夜坐

樹擁書齋夜更幽清燈深坐寂無愁
卻憐窗北琅玕竹一縷風來響似秋

國朝辭林詩傳卷十二

終

國朝畿輔詩傳卷十三

長洲陶 樑覺薌輯 慶雲雀 旭念堂校

張 潛

潛字上若磁州人順治九年進士官翰林院庶

吉士祀鄉賢有讀書堂詩草十卷

四庫全書提要讀書堂杜詩註解二十卷張潛撰是編乃其晚年家居所作以千家註爲本而稍節其冗複凡稱原註者皆千家註每詩下評語及圈點則潛所增入也自稱起己丑迄癸丑閱二十四寒暑五易橐而成其用功甚勤然多依傍舊文尙未能獨開生面

畿輔通志潛明大司馬鏡心子順治己丑進士授內宏文院庶吉士手輯司馬雲隱堂集三十卷梓以行世中年失偶念妻刲股療始一生盡孝終身不再娶人服其義

磁人詩公器質端偉十二歲補博士弟子員選
 庶常以母病乞歸日夜侍湯藥偕妻劉弟衍爭
 割股以進母小愈既而連丁內外艱服闋入都
 會利病大梁道沈荃詢於公公言鄴下朝歌地當
 孔道歲苦供億不支請以後凡大兵駐二郡旁
 邑協濟民力可慰沈然之章上得旨著
 為例歸日手六經史漢及韓柳陶杜集校讐評
 點嘗受經於無錫培孝廉
 生生時周問不絕歿卹其孤

寄殷崇山

蜂刺不到地歲月任逍遙飲憤猶嫌水臨風欲棄瓢千
 峯供杖履一代見瀛洲應共巢居子雲根刷藥苗

重編先司馬集成紀之以詩

遺文忍痛再編摩手澤依然歲月過五載高牙開嶺表

一朝微服渡渾河韋經閉戶丹鉛久諫草篝燈涕淚多
細帙猶存心事在千秋憑弔復如何

贈秦吉生

架上牙籤擁百城茶鐙藥臼午風清知君已就淩雲賦
消渴還應似長卿

譚宏憲

宏憲字慎公大興人順治九年進士

詠畢卓故里

畢公遠俗塵落落意偏冷飲中日韜光餽糟趣自永酒
池了一生寄托殊孤迥醉臥比舍間玩世豈獨醒聊應

太真辟終與胡母並蹙蹙安所適達人發深省游息有
書屋千載留光影我來問鮑陽高蹤動仰景

李鳳翔

鳳翔任縣人順治十一年舉人

泛大陸澤

一幅雲林著此身桃源重過問津人烟凝晚照花添幔
萍長春池鴨有茵幾片漁帆懸碧落數聲野鳥斷紅塵
湖光浩渺渾難醉勃窣詩狂屢岸巾

趙吉徵

吉徵字君孚大興人順治十一年舉人官湖北

應山縣知縣有萊根堂詩選

王士正序先生爲人慷慨負意氣好交游重然諾其詩不取妍當世而翫儻之氣時露行墨間

贈閻古古

岸然挾瑟應齊竿我自貽君五嶽圖別有襟懷扶大雅
豈無天地置狂夫行藏秋雨經巖桂心跡寒冰貯玉壺
若問倦歸陶靖節北窗松菊未全蕪

李振藻

振藻字天葩蔚州人順治十一年貢生官主事

送劉乾菴歸里

擾擾舟車世安農亦所難詩書眞處得天地靜中寬末

俗輕風節吾儕重肺肝歸逢高司寇寄語問平安

劉元徵

元徵字伯誠號夢闌大名人順治十二年進士

官刑部郎中有培園詩集六卷

百家詩鈔夢闌詩敦厚似陳拾遺韶
秀似王汜水沈鬱頓挫幾比肩浣花

暮秋北旋張企麓汪聲耳成我孚送至雲陽北望

湖亭作

榜人欲解纜踟躕步城陰戀戀居人意悽悽行子心相
送不忍別同舟及前林宛轉依河壩緬邈眺蒼岑秋陽
耀原陸草木氣蕭森褰衣陟累榭曠望消煩襟森森澄

湖色曖曖夕景沈遙指江路永彌覺離思深賞心從此
隔佳期杳難尋前途誰共酌濁酒慰獨吟

春日同黃小重孫雪崖飲小園

輝輝暄日長冉冉春雲細欣欣萬木榮霏霏初雨霽寢
疴日屏蹟荆扉經旬閉散帙聞鳥啼開樽喜客至臨溪
攀弱枝穿林摘芳蕙晷運無停軌誰挽羲和轡繁花爭
一時嫣然各自媚擾擾百年內汨汨役愚智良晨不易
逢何事懷百慮取樂貴及時逍遙隨所寄願君愛景光
短章聊申意

涇縣道中

苑陵南去路合沓萬峯開怪石當人立亂流隨馬迴人
家依嶺側烏道上雲隈絕澗蟄龍臥風雷中夜來

登京口玉山清音閣

策杖躡江巘臨風倚梵樓秋天出遠樹夕照見歸舟清
磬雲中發驚濤檻底流坐來塵境隔疑是御風遊

太平劉松舟別駕席上口占

江雲惜別年華易筇市論交意氣雄萬里行蹤驚去住
百年身世感窮通月明城郭潮聲滿雨霽池臺暑氣空
好客中郎還倒屣倦遊司馬自飄蓬

七夕集王文無報恩寺寓齋是日立秋

留滯江鄉歎遑遑良辰樽酒足忘憂一聲清磬諸天靜
四面晴巒小閣幽老去行藏羞乞巧愁來詞賦只悲秋
亦知信美非吾土日暮停雲共倚樓

紀元

元字季愷號子湘文安人順治十二年進士歷
官陝西鞏昌府知府有臥遊山房稿

王士正傳子湘初任杭州司李量移徐州河防
同知陞漢陽府再起知鞏昌府所任皆繁劇地
而處之裕如杭爲東南都會訟獄繁多公多所
平反杭嚴道范印心爲諫垣汪之洙參糾落職
逮問公知其冤力爲剖雪事得白其防河淮徐
也茶菴堤決城不浸者三版閭郡惶避夫役逆
散公屹不爲動曰吾任河工避將焉往此身與
堤當委命陽侯耳遂辦土囊數萬塞之堤完城

無恙守漢陽時蒲圻縣紅石等團跳梁負固大將軍欲遣官招撫皆畏難不敢行公曰叛在賊不在民朝廷赤子豈敢久抗耶慨然銜命往開誠勸諭果相率歸命鞏昌邊徼荒涼民無完堵公招來有法漸次復業修整學宮講明祀典博求遺籍公遇事敢言無所迴護批隙導窾動中機宜以故所至上官皆加器重然亦以才爲人所忌又性疎直不能趨時故蹇而起起而復蹇以卒

夜至西湖對月獨坐

新秋才見月湖水散清輝林外花初落池邊鳥自飛兩峯迴竹嶼一艇到山扉庭際當搖落懷人應未歸

劉芳躅

芳躅字增美號鍾山宛平人餘祐子順治十二

年進士歷官工部侍郎祀鄉賢

易州志增美父餘祐官至少保十齡時從少保
宦中州明上洛王一見異其丰采妻以女本
朝定鼎後成進士授庶吉士補編修轉侍講學
士康熙入年仁皇帝念山左凋敝命往
撫至卽請免秋稅蠲丁徭通行賑卹皆報可先
是山左多勝國藩產正供外仍有租民累甚上
疏免之有黃培者以謗誹繫獄數年株連甚衆
芳躅歸實坐培罪餘悉奏釋之晉工部侍郎丁
內艱歸遂卜居
易水上不再起
紅豆樹館詩話侍郎撫山東時在康熙丁未戊
申之間朱竹垞先生客其幕時泰安州嶽祠久
不治侍郎出廉俸爲僚屬倡尅期增建工畢竹
垞先生爲撰碑記又登繹山他賓從皆懼陰中
輟侍郎獨偕竹垞造其巔撫署廳事有泉涌出
名之曰澁泉蓋取爾雅水自濟出爲澁義也竹
垞記中稱公能潔己於上賓客咸以公之心爲
心若泉之在養纖塵有所不納雖極而至于大

小清河而人于海無非清者則侍郎之爲政亦
皜然不滓者矣詩不多見曲阜晚眺一律自曝
書亭集
采入

曲阜晚眺和朱竹垞韻

孔庭釋菜後攜客步莓苔犧象湯孫徹金絲魯殿開牲
碑工拓就蒼草馬馱回姚少春秋癖言旋罷講臺

劉慶藻

慶藻字虛中號佑申滄州人順治十二年進士

官江南虹縣知縣

九日謝郭道人送菊

窮秋九月荷葉黃北風驅雁天雨霜老翁悶坐空齋裏

無花無酒對重陽
南園道士解人意
移來數種堪佐觴
賁酒黃公博一醉
主人脫卻舊鵝鵝
滿堂坎坎擊鼉鼓
楊妃亂醉西施舞
爾皆絕代之佳人
齊捧瑤觴向我舉
寄語阿嬌莫嬌妬
風雨颯颯愁日暮
茂陵司馬正苦貧
好將黃金買詞賦

田種玉

種玉字公琢宛平人順治十二年進士歷官禮

部侍郎

易州志公琢爲諸生時家貧甚以香爇火照讀
指皴裂弗輟順治甲午舉鄉試第一乙未成進
士選庶常歷官至禮部侍郎性剛介寡合左遷
奉天府丞遂乞歸卜居易水蒔圃自給五十二

年加工部尚書太子少傅

海淀

清秋人意豁引興到郊西金谷昔輝映濠梁今品題插天石劍蘊拂地柳絲齊靜悟疑身隱荷香滿袖攜

馮源濟

源濟字胎仙涿州人順治十二年進士官國子

監祭酒

張庚畫徵錄胎仙山水學董黃布置宏濶筆墨深厚

亦園雅集和李湘北學士

柳陰疑處士草色憶王孫不謂元臣墅還同仲蔚門繞

階分藥圃新水漲隄痕此日傳觴處占星聚一村

魏力仁

力仁字山公南樂人順治十四年舉人官安徽

廬江縣知縣

南樂縣志力仁品格雄偉雙目炯炯善談論尤工小楷雄於詩知陝西中部縣以憂歸補令廬江皆有惠政

登狼山

勝地名山壓海門山形迴合五狼蹲南瞻吳會江光白
東望扶桑日氣昏外府魚鹽增課稅不庭烏窟長兒孫
清時防禦勞宸算特遣嫖姚鎮大藩

張 櫟

櫟南和人順治十四年舉人官國子監助教

南和縣志櫟明廣信府知府應詔孫官東光縣
教諭陞錦州府教授遷國子監助教性寬厚喜
讀書歷任儒官育才造士各著成績告歸年屆
七旬猶手不釋卷幼工書警拔經史多親爲鈔
錄

仙井

百尺寒泉平地生高臺古木遶風清自從至正投符後
雲霧空濛鎖玉京

澧水

淼淼煙波人畫圖黃魚白鳥泛青蒲千家茅屋臨流水

十里香杭在鏡湖

杜鎮

鎮字子靜南宮人順治十五年進士官翰林院

侍讀祀鄉賢有寶田齋草

南宮縣志鎮初知陽信邑素瘠積逋盈萬鎮至
力爲清覈逋欠一清遷內閣中書改刑部主事
預修實錄授翰林院編修累進侍讀乞
歸先是崇禎甲午之變土寇烽起鎮以孝廉家
居衆推爲盟主隨機捍禦數敗鉅寇四境宴然
及告歸適白蓮妖賊倡亂鎮與知縣胡景銓捍
衛有方賊旋授首被俘婦女千餘鎮以
五百金贖之令家人來認取皆泣拜去

懷朱開之選郎

秋色平分露氣清關山千里月華明故園有夢驚聞笛

京國何人共舉觥啟事舊曾留藻鑑

殊恩新擬

拜公卿時危側席需良弼早赴鋒車向闕行

懷賈無染隱君

琴書邱壑自閒閒三十年前早閉關未擬陶潛居栗里
真如安石臥東山秋風故國懸霜鬢夜月金臺照旅顏
指日賦歸尋舊旅相期潁水鹿門間

戴王縉

王縉字紳黃號雲極滄州人明說子順治十五年進士官行人司行人有蕭雲齋集

雨夜懷鄧孝威

憔悴何時已思君苦未休亂山殘樹影野水暮雲秋雨
逐江聲黑虹明夕照收何時重把袂清夢自悠悠

魏雙鳳

雙鳳字雛伯又字陽伯獲鹿人順治十五年進士歷官太僕寺卿有南遊草

陸隴其傳雛伯嗜讀書穎悟非常戊戌成進士
選江右新建令先是以錢糧被累羈候者五令
公下車卽出結縱令還曰吾以一身當則公等
可悉免新建當省會衝繁之區國鼎初定三
藩跋扈軍興旁午公供郵驛理縣事民安盜戢
弊剔蠲清以卓異行取擢御史第一康熙癸丑
試四川道監察御史巡視北城未及瓜特差巡
按兩淮鹽政題蠲湖南江西等郡逋課數十萬
尋爲督捕理事官多所平反壬戌爲大理寺少
卿奉命祭告炎帝虞帝二陵有南征紀

署行世尋遷宗正卒
于官年六十有六

補陀勝境

古寺倚山成雲霞院外生竹搖驚鳥語松響隱泉聲日
午行將倦春殘雨復晴敲門僧未覺可是閉關情

李枝長

枝長靜海人順治十五年進士官四川宜賓縣

知縣

官貧

本是宦情拙休因苜蓿嫌家貧難好客官冷易爲廉佐
食無魚設烹茶掃雪添曾聞尼父訓飲水自安恬

翟廉

廉字靜生號棘麓趙州人順治十六年進士歷
官布政使參議有宦遊偶寄一卷

感懷

兵戈紛在眼骨肉遠關心半載音書滯孤城草木深黃
昏燐火照白日陣雲陰何處猿啼急淒涼遊子吟

高營夜坐感懷

紅衣新熟橘白首老書生解渴閒呼酒思家厭說兵海
天風鼓浪平野月臨雲獨憶黃河北霜寒古趙城

井在

在字存士文安人順治十六年進士官山西興

縣知縣有鐵潭集八卷麗蟬集四卷

黃叔琳傳先生己亥成進士授平陽司李改補
粵之永安令再補晉之興縣以伉直不事上官
年七十二以卒其司李平陽也精敏獨任吏畏
之莫敢仰視而決獄多所平反疑案不可究詰
者務寬期以致正兇不急於鍛鍊入人罪嘗曰
事固有急之則兇奸之彌縫益密緩之則無意
之洩漏可期誠聽斷者之明鑑也值節推裁缺
改補永安令縣隸惠州南嶺大山最稱險利撫
日李唐宗者大猾也盤踞其中蓄髮陰謀不軌
又使曠徒四五百人於赤溪開採招集亡命橫
於一方先生修浚墮陣團練鄉勇爲未事之防
已而三逆煽亂潮鎮劉盡忠密授僞符陰約唐
宗爲騎角先生具得其狀選鄉勇之精壯者三
百人結以恩信日椎牛饗士先是副賊李海政
焚掠村寨先生設伏擒之已而撫檄督府鄧進
兵協勦先生部分鄉勇扼要塞而自以親丁

擬陶飲酒

曾督府兵抵山下賊兵在海上者不得合而逆
鎮劉盡忠亦以先期未發救援路絕唐宗遂殲
髮出山詐降冀以緩師而待援也先生決計勦
蕩遂麾兵梯山抵其巢搜得偽隆武印勅各一
及與潮鎮往來書遂斬宗於軍前而殲其黨雪
其民之脇於賊者百餘家南嶺平太夫人訃至
北歸服闋再補興縣罷還里以詩文自娛子弟
少儔者所陶治蓋數十人陳子儀其最著也著
有天文纂要入憲鐵潭詩集六卷文集二卷合
河署詩集一卷講約六論解一卷簾潭集四卷

棲遲衡與泌家無擔石儲種秫理酒牀相對數卷書興
至過白石揮觴詆太虛啟期何自寬莊周終蘧蘧吾樂
自有真八達何足譽

荒宅慚楊子而有架上書遺悲念手澤世盛感皇初我

憂無以解獨酌情亦舒豈不思共適醉醒殊乃疎所以
楚靈均蕭然賦卜居

灞上輕薄行

風急長安道日暮長安行紛紛灞漣塵向人衣上生促
輪亂馬蹄鞭影控縣旌豈無素相識有蓋莫我傾相逢
游俠兒足捷身致榮去去不相顧誰憐羈旅情

陳聖俞

聖俞字起哉磁州人順治十六年進士官浙江
永嘉縣知縣有寓甌雜咏歸田詩

磁人詩永俗刁猾動操長吏短長中以危言公
至申請免道賦數千金辨復諸生之累誤者十

餘人代民還營償贖其留質妻女以
內艱歸未幾卒永人思之肖像祠祀

歸况

簿書幾載鬢絲斑策蹇歸來學閉關負郭原無田二頃
近廛惟有屋三間薜蘿初製幽人服松菊長怡醉後顏
坐起閒牕無箇事舊時吟草細加刪

李如芳

如芳字仲淵號澹菴高陽人順治十六年進士
官四川酆都縣知縣祀鄉賢有行素堂詩集

四庫全書提要行素堂詩集一卷李如芳撰其
祖父明末皆死于亂如芳閒關冒死訪遺骸于
兵火之中其行誼鄉黨所稱是集如芳
所自編前有李蔚序蔚如芳諸父行也

保定府志澹菴任署陵令以憂歸起補鄧都會
吳三桂反不受偽職賊收羈之三年備極危苦
志不少變乘間脫歸抵荊州叩軍門述賊可滅
狀且畫策制府以聞朝廷嘉之復其官

夜泊嘉魚縣

落日催輕舫孤帆帶夜行星寒微露溼秋淡大江清
草色連天暗漁燈映水明嘉魚何處是隱隱度鐘聲

秋日過衡陽與王文振登大觀樓言別

依依不忍道攜手上高樓北極燕雲遠西山落日愁
蟬鳴楓葉冷猿嘯大江秋楚地知音少因君且繫舟

秋日自遣

寥落江城暮秋風處處同一官三峽外數口萬山中貧

賤差時輩飄零任轉蓬故園歸未得目斷信陵東

讀邑志忠烈傳

公姓李諱秉雲中戊午鄉試明末兵備禹州逆闖入河南公倡率民

兵戰守累月力竭罵賊而死時止傳禹州道死難并不知姓名亦無恤典人皆惜之

大常何事失題名讀罷新書氣不平大歷猶然疑許遠
明皇竟未識真卿一腔熱血歸泉土半世孤忠繞汴城
我欲問天何處問杜鵑聲裏月空明

閨怨

封侯亦何爲眼見梅花老但願郎早歸相將貧亦好

讀曲歌

說來又不來悔儂錯認真隔林呼樵夫問是誰負薪

曹鼎望

鼎望字冠五號澹齋豐潤人順治十六年進士

官陝西鳳翔府知府有楚游新安二集

吳慎傳澹齋父繼祖官別駕舉七子鼎望其一也生而岐嶷天性孝友弱冠補博士弟子員甲午舉於鄉己亥成進士授庶吉士恩遇優渥既而改授章皇帝以時召對秋曹請停嚴冬遣犯歸逃人連坐之冤決疑獄甚多曹中稱其能丙午典試三楚所拔多孤寒士明年出守新安協計勸婺源山賊平之辛亥大旱賑粥活飢民甚衆捐資刻朱子綱目新安文獻志等書日召諸生講學於紫陽書院嗣以不能事當路奪職家居旋起爲廣信守整頓殘破招復流亡請兵籌餉勦賊寇江機楊一豹等復乞蠲七年逋賦以憂歸復起爲鳳翔守開墾蕪地寬減科條請停防漢更番兵馬修橫渠祠喜雨亭以勵後學郡中稱治丙寅以老乞休邑

令羅景泐屬修邑乘多所考核
爲一縣信史卒年七十有六

紅豆樹館詩話冠五妙諸墨理自製墨有玻璃
光掌珠書畫舟天保九如諸款識背有曹冠五
藏墨字下刻澹齋印其刻瘦畫印者公子鈔所
作也皆擣曹素功墨數萬杵重和佳料製成祇
供自用間以貽人無市心視方于魯羅小華不
知何如要其淘鍊精緻烟細膠輕良非近來驟
歛墨工所能及

石照山

曉出玉華門渡溪復越嶺茂樹欲參天盛夏翻清冷幽
壑隱禪關隔斷塵千頃側見古亭邊石照傳奇景翠峰
危以特壁光開而炳詎止鑑鬚眉羅列山河影惟空故
生明惟靜乃能永昏昏行役者胡不發深省

小塔寺

楚天黃葉暮禪院白雲封徑僻宜乘興亭留爲勸農亂
篁迷小塔斜石倚孤松久坐從僧話林端送晚鐘

漢口別舍弟

汝從燕馬去余向楚州來歸夢隨江水離愁入酒杯暫
分鴻雁序先到鳳凰臺有約遲冬杪齋頭看臘梅

斗山亭同人夜集

樽前一嘯晚烟空王謝風流定屬公人擬琴書六水上
亭圍山影半天中紫簫吹處襟懷濶青眼開時意氣同
潦倒不辭今夜醉舉頭明月挂疎桐

江月

雪盡羣峯出江空一月浮清光流不去偏照異鄉愁

黃州雨泊

潯湧千層雪江飛萬縷烟雨餘山欲暗赤壁夜停船

崔華

華字蓮生平山人順治十六年進士歷官陝西

莊涼道祀鄉賢有公餘詠

畿輔通志華性孝友七歲失怙哀動路人
事伯兄如父官俸所入悉以分之昆弟不私一錢初
授浙江開化令遭耿逆之變城守武弁潛蓄異
志與賊黨通華親率義勇奮殺賊衆五十餘人
餘黨望風遁去完保疆圉以功加三級又請全
嗣康熙十三年至十六年寇亂以來遺欠錢糧

民困以蘇擢揚州守
遷陝西莊涼道卒

山遊紀勝

冲襟躡秋岑日落千崖聳孤嘯臨遠風勢與江波動輕
策冠飛鳥萬象接幽蹕寒姿結霜標陰泉澹雲孔橫攬
空濛表不知烟靄重拂石憩古苔撫松託修煉江色在
衣帶寒濤坐來湧

師子巖

崇巖吐青冥光響限林谷棲神蹟未化踐幽境轉肅緣
流亂水區遵石入雲族忽與烟霧并稍知日月伏目恬
天嶺交心霽風霄穆江海有端倪乾坤不盈掬翛然叩

虛抱松風媚幽獨

合掌峯

奇峯闕天經合沓神化積密石涓細流陰霞蕩虛壁息
心響空音萬象俱踐夕流景媚林姿歸禽度雲隙平挹
遙海蒼俯睠雙湖白空水倒羣峯恍惚天地易洪幽撰
耳目眺聽理勿隔永觀元化初於焉振霄翮

詠史

戰國能得士獨有信陵君侯嬴旣已死毛薛眞其人諫
使返大梁鑿鑿名教言紛然縱橫子誰能與之倫當其
隱博徒目乃無平原識士良不易彼誠何足云

仲連天下士區區負高名直欲致魏救帝秦匪所爭燕
將守孤壘爲書射聊城勸使東遊齊頗亦傷縱橫傲然
輕富貴志乃高儀秦強作非自然安釐誠知人

燕丹志存燕報讐匪所亟匕首遣荆軻不獨爲刺客要
使亂咸陽乘間合六國壯士去不還易水空蕭瑟嗟哉
樊將軍授首曾不惜那知燕丹頭更向函關入

陸賈善藏身英雄有道術客從高祖遊辨士聊託蹟功
臣食報終賈乃肆微力說粵來遠人新語開文墨女主
旣臨朝諸呂勢傾側度不可口爭病免就家食斥賣橐
中裝分金買田宅深心出妙用交歡啟平勃功成身不

有機智人莫測名之曰辨士母乃非其實嗟哉子房儔
千載誰能識

越西行

越西之疆古姑蔑南走滇黔右兩浙萬山迴合抱孤城
一道金溪沸奔雪狂氛一夜吹黑雲閩關以北無堅屯
國家承平三十載卒見烽火皆崩奔彈丸小邑千巖
底蹄之直用鞞尖耳城存與存亡與亡不死猶圖報

天子奔走風塵萬嶺間齧指血濺蟠桃山浮圖一
矢賀蘭志誓不與賊生同天仰天叩心天鑒此收城豈
雪生民耻百里提封謝

主恩孤臣待罪甘心矣

十年長吏愧蒼黎
亂後還驚有子遺
君不見月波亭上
清秋魄依舊含情照越西

按此詩蓮生令開
化時禦賊之作

京口

京口千帆集江天
一望遙人烟沙市沒樓閣海雲飄
瓜步連春雨蕪城隔暮潮
何人夜吹笛風月坐蕭蕭

竹西亭

歌吹揚州路西亭
舊足誇香風散羅綺
夜月寫琵琶畫
鷁停深柳春城覆
落花追思全盛日
腸斷玉鉤斜

毘陵道中

掛席當春杪
毘陵古岸丹柳
攀江雨細亭沒
成雲浮歲

禩花空發城荒麥未秋東南財賦地誰慰
一人
憂

到郡

到郡煩津吏官舟泊水亭繁華非宿昔鴻雁歎飄零野
岸棠陰綠春城麥氣青爲憐諸父老露冕駐郊坰

吳門道院彌羅閣

飛閣層霄迴獨攀凌虛憑眺俯人寰金鋪晝暝棲雲霧
碧落風輕禮珮環檻外天低吳苑樹牕中人倚洞庭山
花洲錦纜知何處千里毘陵一夜還

題畫

嵐翠落空江猿聲啼不住明月照漁舟繫纜青楓樹

維揚感懷

燈船歌管醉春嬌不夜邗溝廿四橋三載鴻嗷秋月冷
蕪城何處聽吹簫

蔣宏道

宏道字裕菴大興人順治十六年進士歷官都
察院左副都御史有來仲軒詩草

燈下菊影

白雁橫秋霜外飛疎簾半捲夜牕圓只今人坐寒香裏
似踏柴桑醉影歸

寧爾講

爾講字元著永年人順治十六年進士官山西

道監察御史

永年縣志爾講爲監察御史巡視西南二城豪猾斂蹟巡鹽兩淮任滿丁父憂服闋補御史疏請清流品嚴冒濫愼選舉正服色請召對別襲庶停奪情凡七事疏上荷溫旨後以言事獲譴罷歸康熙丁丑起用湖廣道御史卒於京師

南園卽景

沿流踏草露遙見山雲起片片隨風來蒼然度湓水迤邐到南園雲水流門裏牕後列匡牀牕前羅圖史新筍未成竿芍藥方含蕊不聞城市喧名利心自己留客乏

兼味引釣上鮮鯉飲酒不及醉和歌聊自喜不嫌孤村
僻巾履更到此

金陵別蔣波澄

颯颯秋聲動客哀武林高士幾徘徊文章已定連城價
風雅還傾陶令杯六代繁華留碩果三山烟雨落莓苔
挑燈夜話情無極別後相思湓水隈

高恒懋

恒懋字勵昌號乾甫靜海人爾儼子順治十六
年進士官奉天府教授

天津府志恒懋總角卽善屬文侍少保京邸
世祖諭公卿子入侍將備輔導方面之選

少保以姪恒豫失恃撫愛若已出恒懋承父志
遂以恒豫應焉辛卯恒懋舉鄉薦少保公卒
朝廷恩蔭一子恒懋復讓恒豫己亥舉進
士以祖老須養遂改大寧教諭奉天教授

同友人過華藏菴

長夏蕭疎倦倚樓相將蘭若慰沈浮
午鐘敲醒十年夢
溪水流殘半世愁
塔影斜侵青嶂冷
茶烟不斷白雲流
徘徊竟日風塵外
話到無生意未休

李 仲

仲高邑人順治十六年進士官河南永寧縣知
縣

千秋臺

千秋事業祖孫同小邑還堪歌大風趙北山河終不改
洛陽城闕已成空映臺芳草萋萋碧隔樹明霞雪雪紅
無限遊人增感慨一杯爲酌夕陽中

成克大

克大字子來大名人克鞏弟順治十七年舉人

歷官貴州鎮遠府知府有歷游詩十卷

大名縣志克大因母老不仕終養後始授內閣
中書轉戶部廣西司主事再遷貴州司員外兩
省皆用兵地度支持籌數倍他司克大練達精
密事辦暇豫時創設粵海關克大受命
監督香山溼舊爲洋人所居名爲鬼卒俗尙火
攻其酋長率隊來迎刀劍森列克大宣
上恩威皆懾服有商激怒鬼卒奔訴求救鬼卒
蜂擁至門洶洶不可測克大神色自若手檄通

譯集曾長責以大義事遂解復本部江西司郎
中授貴州鎮遠府知府當兵燹後民憊兵騎
苗人雜處克大招集流亡興學校禁奸宄抑兵
化苗政績詳載屏山遺愛碑克大性激烈齟齬
不合於時以兄克羣卒請歸著有歷遊詩春秋
精義兼善顏真卿書法卒年六十二于說康熙
二十三年舉人授內閣中書說以父喪未得
親舍殮終身不復仕里居二十年鄉人重之
王原序先生詩寄情山水流年景物興致瀟灑
文章淋漓其胸次空濶直如雲海蕩滴吟誦之
下令人神往魂悅

新春滇江晚泊

度歲凌江城頗喜山繞郭一雨連昏朝春陰瘴如幕放
船墨水濱倚檻歷巖壑曠覽物候新况復霽景廓夕日
照灘淺歸雲擁岫薄疊嶂聚螺青孤峯峻如削茅屋隔

疎林柴門倚山脚初月印溪流扁舟沙岸泊晚眺防崇
岡但覺襟懷豁坐石聽潺湲風烟光參錯銀漢縱橫迴
玉繩明且灼揮毫書所見愧乏登高作三月客載途弦
望感今昨男兒志四方氣每凌海嶽偶爲萬里行勿嗟
滯嶺釐醢酒對清虛意豈在觴酌鬱鬱胡爲乎謝彼羈
與縛勗哉立榮名俯仰聊寄託

望洋臺

峻嶺有高臺突兀南溟岸長風萬里來天際帆影亂極
目荒徼外一氣疑未判蛟室邈難卽層樓聚復散天吳
時出沒驪龍珠光燦四海無揚波重譯來浩瀚百貨走

如驚有無相易換溷賈罔市利此地立龍斷攘奪數實
開掩襲肆狡悍橫山起軍壘張威護里閤外禦異己者
會使諸彝憚我來一登臨狙獮信難捍嗟彼番鬼謀貿
遷操勝算但恐恣驕縱與世成冰炭濫觴不在多積微
固有漸勿令登臺人徒作望洋歎

雜感

伯牙敲清商子期獨會心流水猶在耳高山杳以深白
日無顏色意氣忽消沈擗琴不再鼓雅操難爲今吁嗟
矢同調幽思渺虛襟既知所好乖往者不可尋鬱紆中
自解寄志聊狂吟達士欣忘我何必懷知音

黃鵠飛不下徘徊失其羣
鵲雀躍蓬蒿其意良自欣
物各有本性所適畫然分
無端強之同猜忌日紛紛
仰視浮雲徂湛湛此高雲
好風自天來爲我驅游氛

仲冬赴潯

嶺外朔風起颯颯吹我裳
仰天見浮雲將無來故鄉
故鄉隔萬里北雁無南翔
鄉書阻逾時竚立心彷徨
久客復行役雲水渺相望
前路何須問風波感慨長

炎方霜雪少海氣夜寒生
飄搖舟一葉遊子衣裳輕
飢渴莫我問骨肉萬里情
泠泠晚潮水淒清欸乃聲
獨憐宵征客憔悴百愁并
顧影無儔匹仰盼悲參橫

過南贛

雙江清見底環繞古虔州水勢奔灘險風烟接瘴愁
菜花開野岸梅片落汀洲歲暮嗟行役征帆去不留

雨中過峽口

兩山高夾岸亂石咽奔流綠樹陰如夏黃花開似秋
風來能奪纜路去僅容舟巖壑方生翠先春雨未收

度嶺

紆鬱梅關路層巒鑿削開歲闌人北去花候我南來
嵐翠蒼烟結寒香細雨迴使臣方叱馭駐馬又徘徊

保昌道中

驅車方度嶺髣髴到山陰松老晴雲護峯奇翠黛深濤
聲來曲澗花氣透叢林瘴海春何早和風滌客襟

濠鏡澳卽事

編竹張飛蓋肩輿類短牀兜羅衣尙錦篤耨珮含香茱
莉蒸花露檳榔當酒漿倭絲襟底貯但喚不須嘗

海幢寺送客登眺感懷

萬里浮槎至憑高望越臺潮平梅雨歇天闊島雲來霸
氣餘殘壘王宮盡劫灰無邊惆悵意送客酒盈盃

酬張仲張屏風山野泊之作

夕陽慘淡欲黃昏湖上孤舟山下村廬岳峯高含雨氣

楚江潮落見沙痕臥霜漁唱蘆花岸得句人傾竹葉樽
萬里使車何日到嶺雲灘樹望銷魂

鄭 茂

茂字子勉號紫沔永年人順治十七年舉人官

福建武平縣知縣有竹邊樓詩草

申涵光序子勉深沈善下每事必精專乃退然
如不足者詩渾雅似儲潤州時有精刻之思出
人意表予好誦其曠日當
窻暖飛塵亂隙光一篇

都門霜降日作

風雨連朝動客愁笳聲嗚咽滿邊樓捲簾何事看新月
一夜霜寒木葉秋

國朝畿輔詩傳卷十三

三

國朝畿輔詩傳卷十三終